



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA KUMI

Kikao cha Kwanza – Tarehe 09 Mei, 2018.

Kikao Kitaanza Saa 3.00 (Tatu) Asubuhi
na Dua itasomwa.

I. TAARIFA YA SPIKA:

II. HATI ZA KUWASILISHA MEZANI:

Waziri wa Nchi, Ofisi ya Makamu wa Pili wa Rais:

Nakala zote za Gazeti Rasmi la Serikali pamoja na vijalizo vyake kuanzia tarehe 29 Februari, 2018.

Waziri wa Nchi, Ofisi ya Makamu wa Pili wa Rais:

Hotuba ya Makadirio ya Mapato na Matumizi ya Ofisi ya Makamu wa Pili wa Rais kwa Mwaka 2018/2019.

Mwenyekiti wa Kamati ya Kusimamia Ofisi za Viongozi Wakuu wa Kitaifa:

Hotuba ya Maoni ya Kamati ya Kusimamia Ofisi za Viongozi Wakuu wa Kitaifa kuhusu Makadirio ya Mapato na Matumizi ya Ofisi ya Makamu wa Pili wa Rais kwa Mwaka 2018/2019.

III. MASWALI:

Ofisi ya Makamu wa Pili wa Rais:

17. MHESHIMIWA JAKU HASHIM AYOUB (Jimbo la Muyuni) - Atamuuliza Mheshimiwa Waziri wa Nchi, Ofisi ya Makamu wa Pili wa Rais:

Hivi karibuni Kampuni ya Export Group iligawa majiko salama huko Mahonda kwa ajili ya kupunguza athari za kimazingira pamoja na kutoa elimu ya utunzaji mazingira.

- (a) Kwa nini elimu na mgao huo umetolewa Mahonda tu.
- (b) Kuna utaratibu gani wa mpango huo ukaenea katika maeneo mengine.

Ofisi ya Rais, Tawala za Mikoa, Serikali za Mitaa na Idara Maalum za SMZ:

1. MHESHIMIWA SIMAI MOH'D SAID (Jimbo la Tunguu) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Serikali imekata viwanja katika maeneo ya Tunguu mji mpya pamoja na Jumbi mji mpya, ambapo kwa sasa panaelekea kuwa ndio Makao Makuu ya Mkoa wa Kusini hasa ukizingatia ofisi za Serikali ya Jamhuri ya Muungano wa Tanzania pamoja na za Serikali ya Mapinduzi Zanzibar nyingi kuwepo katika maeneo hayo.

Je, ni lini Serikali itaboresha barabara za ndani katika maeneo ya Tunguu pamoja na Jumbi.

166. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Katika kuendeleza miji ya Zanzibar kuna mambo mengi ya maendeleo ambayo kwa kipindi sasa yameondoka kama vile katika mji wa Chake kulikuwa na vyoo vya mji vya kujisaidia maeneo mengi kama vile Stendi ya Chake Chake, Banda la taka, Msingini karibu na Ofisi ya Makamo wa Pili wa Rais Chake Chake, na pia katika majumba ya starehe kama sinema na vitu vyote vyengine havipo tena.

- (a) Je, Serikali ina mpango gani wa kuvirudisha vyoo vya asili vilivyokuwepo zamani katika mji wa Chake Chake.
- (b) Je, vyoo hivyo maeneo yake bado yapo kama hayapo Wizara inasemaje.
- (c) Kama Serikali haina mpango tena wa kujenga, Je itampa mtu binafsi eneo jengine.

Wizara ya Fedha na Mipango:

108. MHESHIMIWA HIDAYA ALI MAKAME (Nafasi za Wanawake) - Atamuuliza Mheshimiwa Waziri wa Fedha na Mipango:

Eneo la Kizimbani limekuwa na mashamba mengi ya viungo vya asili vya Zanzibar ambavyo wageni mbali mbali wanafika kutembelea na kuna mapato yanapatikana kutokana na ujio wa wageni hao hasa watalii. Hata hivyo, fedha zinazokusanywa kwenye maeneo hayo ya mashamba ya viungo (spices) haziwanufaishi wanajamii wanaoishi katika maeneo ya Kizimbani ambao wanayatunza mashamba hayo. Aidha fedha hizo hazifiki Wizara inayohusika na kilimo ambayo ndiyo inayosimamia shughuli za kilimo.

- (a) Kuna utaratibu gani Wizara itauweka kuhakikisha kuwa sehemu japo ndogo ya mapato hayo inanufaisha jamii ya Kizimbani.
- (b) Je, kwanini fedha hizo zinakusanywa na Wizara ya Fedha wakati shughuli zile ni za Wizara ya Kilimo.

Wizara ya Kilimo, Maliasili, Mifugo na Uvuvi:

59. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa mashamba ya Serikali ya eka ya minazi na mikarafuu ni mali ya Serikali ambapo kwa upande wa Pemba, mashamba hayo yapo chini ya Wizara ya Kilimo, Maliasili, Mifugo na Uvuvi na kwa upande wa Unguja mashamba haya yapo chini ya Wizara ya Ardhi, Nyumba na Nishati jambo ambalo linaonekana kama kuna mgongano kati ya Wizara hizi katika usimamizi wa mashamba hayo.

- (a) Je, Serikali haioni kwamba kuachiwa mashamba kusimamiwa na Wizara mbili ni tatizo.
- (b) Je, ni sababu gani iliyopelekea mashamba hayo kusimamiwa na Wizara mbili tofauti wakati taasisi zetu zina lengo moja la kuwatumikia wananchi.
- (c) Je, ni mashamba mangapi ambayo yanasimamiwa na Wizara ya Kilimo, Maliasili, Mifugo na Uvuvi na mangapi yanayosimamiwa na Wizara ya Ardhi, Nyumba, Maji na Nishati.

Wizara ya Biashara na Viwanda:

175. MHESHIMIWA ASHA ABDALLA MUSSA (Jimbo la Kiwengwa) - Atamuuliza Mheshimiwa Waziri wa Biashara na Viwanda:

Shirika la Biashara la Taifa la Zanzibar (ZSTC) linajukumu la kuwa na mwakilishi wa kusimamia masuala ya biashara ya Shirika nje ya nchi.

Je, mwakilishi huyo anaetakiwa awe mtendaji mwenye sifa gani.

Wizara ya Ardhi, Nyumba, Maji na Nishati:

37. MHESHIMIWA ALI KHAMIS BAKAR (Jimbo la Tumbe) - Atamuuliza Mheshimiwa Waziri wa Ardhi, Nyumba, Maji, na Nishati:

Naipongeza Serikali ya Mapinduzi Zanzibar kwa kutekeleza azma kuu ya kuwajengea wananchi nyumba za makaazi ambayo Wilaya ya Micheweni ni moja ya Wilaya iliyofaidika na nyumba hizi za vijiji. Hata hivyo, kwa sasa nyumba hizo ni chakavu na ramani zake zimepitwa na wakati.

- (a) Je, ni kiasi gani cha fedha kinachohitajika kuziimarisha na kuzifanyia ukarabati nyumba hizo.
- (b) Ni kiasi gani cha fedha zilizopatikana katika kipindi chote ambacho nyumba hizo zinakodishwa hadi sasa.
- (c) Je, ni lini Serikali itatoa kauli ya kuwauzia wananchi wenye uwezo nyumba hizo.

Wizara ya Ujenzi, Mawasiliano na Usafirishaji:

55. MHESHIMIWA MWANAIDI KASSIM MUSSA (Nafasi za Wanawake) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa kawaida Shirika la Bandari Zanzibar moja ya kazi zake kuu ni upakuaji wa makontena ya mizigo, ambapo shughuli hii hufanywa kwa mashirikiano na taratibu za TRA, ZRB na ZBS. Hata hivyo, imebainika kuwa kwa kipindi kirefu sasa kumekuwa na mtindo wa kutoa magari hayo ya mizigo nyakati za usiku, huku taasisi shirikishi zote zimeshafunga kazi na kuondoka.

- (a) Je, Wizara mnataarifa kuhusu jambo hilo.
- (b) Ni hatua gani mlizochukua za makusudi kukomesha vitendo hivi visiendeleo.
- (c) Je, Wizara kupitia watendaji wake hatuoni kufanya hivyo ni kuikosesha mapato Serikali.

IV. HOJA ZA SERIKALI:

Waziri wa Nchi, Ofisi ya Makamu wa Pili wa Rais:

Kwamba Baraza hili liingie katika Kamati ili kujadili Makusudio na Shabaha zilizomo katika Makadirio ya Mapato na Matumizi ya Ofisi ya Makamu wa Pili wa Rais kwa mwaka 2018/2019.

**Zanzibar,
9 Mei, 2018.**

**(Raya Issa Msellem)
KATIBU WA BARAZA.**